

OLA

PULETINI A'OGA

e faasoa faamatalaga mo a'oga i le gagana Samoa

www.ola888.com



27 IULAI 2015 ~ LOMIGA 22 ~ UPEGA TAFAILAGI: www.ola888.com ~ TUATUSI FESOOTA'I: saili.niupac@gmail.com; evaleon.books@gmail.com ~ E le faatauina ~ A FREE PUBLICATION

~ Tusiga tala ~

E fiafia e faasilasila atu la tatou tauvaga tusigatala mo le faailogaina o le 5 tausaga o le OLA Puletini Aoga.

E tolu vaega e faaulu mai ai:

1. tauvaga a le fanau a'oga, Tulaga lua
2. tauvaga a le fanau a'oga, Kolisi
3. tauvaga soo se tasi

Ulutala: Pule oe i lau ulutala

Umi o le tala: 1000 i le 2500 upu

Gagana: Samoa

Aso e faagata ai: 6 Setema 2015

Lafo mai loa ile tuatusi:

evaleon.books@gmail.com

Poo le Itavita8@gmail.com

O le a saunia ni faailoga lelei.



FAUSAGA FOU: O le lou ma lona fuata le fausaga ma lona siosiomaga e pei o le vaaiga ia Kalaiesetete i leni vaiaimi. Pe le o le fausaga lea mo le lumanai? E le gata e taugofie koneteina ae anagata. E lua lava pusa ae ofi lelei se aiga. E talimatagi foi ma le satia gofie i ni mafuie.

Sauni le fanau mo le tauvaga tautalaga faa-Samoa 'tautua ma le faamaoni nei sou taeao manuia'

O le faamoemoe o le FAGASA Aoao mo lana tauvaga faale tausaga i leni tausaga, i tautalaga faa-Samoa, o le a faataunuuna lava i lona taimi tuupoina.

O le Aso Tofi ma le Aso Faraile o le vaiaso leni o le a tauaofia ai ana sui tauva mai motu e lua o le atunuu, i le nofoaga o Malaeola i Magele, lea o le a faataunuuna ai. O le faalua ai lea o taimi ua fai mai ai le tauvaga i Aukilani.

E lima taulaga o loo ua aafia i le faamoemoe, o Tanitini, Inivekako, Kalaiesetete, Ueligitone ma Aukilani.

E silia i se 90 le aofai o le autauva afua mai i le Tausaga 5 e aulia le Tausaga 13.

O i latou ua filifilia mo le tauvaga leni na fili mai i isi tauvaga a taulaga e pei ona ta'ua. I le tauvaga a Ueligitone na finau ai se 44 ae fili mai ai se 21 lea o le a tauva i leni vaiaso. O iuga o na tauvaga sa fola manino lava i luga o nusipepa e iai le Samoa Times, i ripoti a le peresetene o le FAGASA ua tuanai atu.



E faapena foi le tauvaga a Aukilani na talimalo ai le Kolisi a Te Aroha.

Leni o le a iloilo i le toe aso nai Moamoa ni e ua agavaa i tulaga o siamupini aoao i leni tausaga.

E 50 togi e tatau ona maua e le sui tauva. Ua vaevaeina faapenei: 5 i le mataupu; 5 i le logomalie i le faafofoga, 10 i le fausaga, 10 i le moliga, 20 i le gagana, ona maua ai lea o le 50.

O auiliiliga o nei vaevaega o loo manino lava i totonu o pepa e iloilo ai tautalaga. E tolu minute le umi o tautalaga a Tausaga 5-8. Fa minute mo Tausaga 9-10, lima mo Tausaga 11-12, ae ono minute mo le Tausaga 13.

O le Aso Tofi e tatalaina ai le tauvaga e le Komesina Sili a Samoa i Niu Sila, le Afioga Leasi Papalii Tommy Scanlan, o ia foi le faatamā o le faalapotopotoga.

*Ripoti o le Vaiaso:***Naunau le Ua Sina Le Galu e fai se faamau tala faasolo**

E toafitu tina o se mafutaga ua sauni e tusia o latou suafa i le tala faasolo o mau tusitusia e ta'u ai le ekalesia ma le gagana Samoa.

Muamua, o ni e sa galulue i le galuega tala'i o ni faletua ua malolo mai i le galuega. Lona lua, o ni tusitala Samoa ua filifili e faamau sa latou mau nei ma e luā, e faaoga ai la tatou gagana.

Ua iai se fuafuaga i le Ua Sina le Galu e tapena se tusi. O se tusi e faamau ai a latou tala i o latou soifuaga, ae faapitoa i le nafa o le Faletua poo le Tina o le Galuega. E lei iai se tusi faapea e faasino tonu ia i latou ua saunia, ma e talitonu o se uluai galuega lea faapea pe afai ae tau lau o le faamoemoe.

I se talanoaga ma le afioga i le peresetene o le mafutaga, Iolesina Faigame Tagoilelagi, na ia saga faamanino ai le faamoemoe o le tusi. Muamua, e faamau se tala e avea ma molimau i le fe'au tala'i. O misionare papalagi sa tatou a'oa'o mai ai le tu i le tusitusia ma le fiafia e faamau mea sa tutupu.

O a latou molimau o loo ua avea nei ma ni punaoa aoga i e sailiili tofa. E le gata i aga o le galuega tala'i, a o le tala faasolo o mea na tutupu.

O le agaga foi lea, ia fai se 'ai mo le galuega tala'i ma fanau lalovaoa a le ekalesia. E faailoa foi se vaai mai le Tina o le Galuega i le faatinoga o lana pitolaau. E aoga lea mo faletua o loo faaolioli atu



TINA O LE GALUEGA: Na mua i faiva mua foi i le tusitusi. Dr Lonise Tanielu, Pauai Faamanatu Afele, Sieni Sasagi, Mere Sale Autagavaia, Lulu Paulo Leleisiuao. E le o iai i le ata Simalo Afamiliona Manuo. Iolesina Faigame Tagoilelagi (ata i lalo).

mo le galuega. Saunoa Iolesina, ua pulunaunauina le autusitala e tusi uma mai lelei ma leaga. Ne'i aumai na o mea malie ma faigofie ae tuu lavelave. Ae mea ane o mea taua na e a'oa'oina ai ma ganea ai le faitau.

O a latou molimau foi e le tafatasi i le na o le galuega tala'i, ae faasafua e aofia ai isi vaega o le soifuaga. E le gata o le tina tausii aulotu, a o le tina tausii aiga, tausii fanau, osi aiga, ola atia'e i faiva ma taleni, ma tulaga uma faapena.

O nisi vaega taua i le faitau atu i lautusi ua maopoopo mai, o tala i o latou tupuaga, o nisi vaega malie na o le faitau. E pei o le upu a le atunuu, e itiiti a'a o le laau i a'a o le tagata.

O le tusitala matua i le toafitu o Sieni Sasagi, 85 tausaga le soifua, e tele sona silafia i mea sa tutupu i le ekalesia ma Samoa foi. E maeu foi lana tala auā e lua ana faaipoipoga, a o faifeau uma.

E ese foi se vaai faapitoa a le tina ia Lulu Paulo Leleisiuao, sa galulue ma lona alii i ekalesia e lua, le EFKS ma le Metotisi.

O le susuga i le faletua malolo ia Lonise Tanielu e le tau faailoaina. O se tasi faletua na faaee i ai le faailoga maualuga o le Fomai i Mataupu Tau A'oga i Aukilani. O lana tala e tulaga ese foi, o le



alo o se faifeau, ma se faletua o se faifeau mulimuli ane.

Ae e le itiiti foi ni molimau i isi uso a tusitala, aemaise lona peresetene. O le a talatalaina lava i le tusi.

I le taimi nei o loo galulue tusitala mo le faamae'aina o a latou tala. O se taimi o Oketopa i le tausaga nei e fia tuufaatasi ai, ma fuafua ai le toe laasaga.

Na o le tasi le tusi ua lomina e faasino tonu i tina Samoa, o lona a Tagaloatele Peggy Dunlop, Tamaitai Samoa. O lea ua faaluaina i le faamoemoe ua taoto nei i Paga, i le tusi a le mafutaga Ua Sina le Galu, e faasino tonu i le nafa a le vasega paia.

O le a le fesiligia se aoga o le tusi i le faaso upu a Samoa, e le gata i le tala lelei, a o la tatou gagana ma lona faaualoaina.

OTOOTOGA**Tele tupe ua alu**

Ua sauni le minisita e toe tului se isi faaopoopoga o tālā i se tasi a'oga siata i Northland, e ui ina sa fautuaina o ia e taofia sea faiga e le kamupani Suetusi na iloiloaina le fa'aaogaga o a latou tupe. E faitau miliona tālā ua mae'a ona faaalu e le malo i le a'oga a Te Pumanawa o te Wairua. I le su'esu'ega a le Su'etusi na iloa ai ni faaletonu i le faamauina o fuainumera o tupe faaalu.

Ta'ua i ripoti e leai se taiala (curriculum), e lei mae'a lelei ona fau falea'oga, e lei mautu lelei tapenaga o lona tatalaina, saunoa mai Tracey Martin o le NZ First.

Lea ua aga'i tonu nei i ai faitioga a le Leipa ma isi pati i le auala o loo faaoga ai tupe a tagata togi lafoga.

Agiga i tala vale

Ua agiga i tala vale le igoa o le Destiny ona o le tulaga tauseleni e aafia ai ana atina'e o a'oga i Manukau. O le Destiny o se faalapotopotoga lotu o loo taulamua foi i le atina'e o a'oga i Aukilani i Saute. I se iloiloaga lata mai o lona tulaga tautupe na iloa ai se gau e tusa ma se \$240,000. O lea tinoitupe na ia faaune mai i le tasi ona lala e faatumu ai le ava lea.

Ae na saunoa lona ta'ita'i, Bryan Tamaki, e faapea e itiiti se fesoasoani mai a le malo i ana atina'e a'oga. Lata mai na te'ena ai e le minisita lana talosaga e fia faavae sana a'oga siata.

E tele ni mataupu ua agiga ai le igoa o lenei faalapotopotoga i ni foliga e le tausaaafia.

*Faasoa o le Vaiaso:***O le taua o le tusi ma faamau o mea sa tutupu**

E le faigofie ona tusi se tusi, pe tuufaatasi ni manatu e avea o se faamau tusia. Po o le gagana Samoa po o le Peretania e tele ona lavelave ma fitaituga.

Mo se aganuu e pei o Samoa e ama i le tusitusi ae tiu i le fetalai, e mautinoa o le a le faatele'a'i se suiga, ma e ono avea o se mataupu i le lumana'i i mea tau su'esu'ega e faamoemoe i mau tusitusia.

Ina ua faato'a lomua le tusi a Tui Atua Tupua Tamasese, Ia faagaganaina oe e le Atua Fetalai, na tele ni taofi faaali e aofia ai le lagona faapea, o le mau lava ia a Samoa e le faamauina i ni tusi ae taofi e le mafaufau ma le lotu.

E moni. O se mea fou le faamau o le tofa ma le moe i se tusi.

Ua faitau aso talu mai lona ulua'i lomiga, o le fesili, faamata o aoga le tusi? O le tali, tele le aoga. O loo ua avea nei ma se punaoa e sailiili tofa i ai le toatele. E mau-manatu ai le failauga, e maua ai le a'oga taua i le olaga mai le potomasani o le tusitala. O le a le gata mo nei tupulaga a o isi fai a'e.

Tele tala aave o Lauaki Namulauulu Mamoe le failauga a Pule. Atonu o iai ni faamau o ni ana fetalaiga tuusa'o. O se tala fiafia ona o se tusi ua saunia, tau ia o se tali i le mana'oga e pei ona folasia. Auā i le iuga o le aso e galo foliga, galo le leo ae tumau pea upu faamau. E pala maa ae le pala upu e pei o le muafetalaiga.

Tulai mai ni faamasinoga a le aiga i Samoa i mea tau fanua ma suafa. A ua mautu molimau a le fanau talu ai le sogasoga o le tuua sa ia faamauina mea taua i totonu o api. Lea ua mautali ai le fanau, a o le vaai mamao a le tamā po o le tina ua fai i lagi folauga.

O nisi o faia'oga a le gagana ua fa'alo mai, a ua mautu so latou sao i le faamau upu a le atunuu. E ui e le'i aoga i ni iunivesite pe ave ni kosi i le tusitusi, ae sa malosi le

lotu ma le naunautaiga e fai se tuu mo fanau o loo fai a'e. O a latou galuega e maua i ai nisi o faamau ta'utino mai le potomasani o ni matai ma ni faia'oga i o latou taimi. Ana le faamauina po ua maumau e oo i le faavavau.

E moni. E fai foi o le fia fai tusi a o le tau e fai ai le tusi. E le taugofie le faitusi ma le lomiga o le tusi. Ua silafia foi e le maua ai se fale o se aiga i se tusi. O luitau uma lava na. Ae ana le sogasoga soo o Iesu ma faamau le tala, ailoga i se a tatou te faalogo i se faa-Kerisiano?

Fai mai nisi e maumau le tusi o tusi i le tatou gagana. E leai ni tagata faitau e pei o le gagana Peretania. Afai o le tupe, E sa'o. E le faatusalia tatou i le lalolagi o tagata faitau tusi i le gagana Peretania. Ae afai o le taofi e mafua i le manatu faatalale i le tatou gagana, ona sese lea. E foliga o loo tau atia'e pea so tatou naunauga e faitau ma faamau i la tatou lava gagana, e faatusatusa i le tulaga o le saunoa ma le fetalai ua loa le soifua mai ai. A ua sui foi le taimi. O tupulaga nei o upu faamauina.

O le fuafuaga a le Ua Sina le Galu e fia fai sona sao i le tatou faamau upu, o se faatupu moemoe atili i le miti. O le miti mo tatou uma. E le na o le faaoga o le gagana i talanoaga o aso uma, a ia avea le faitau ma le tusitusi o ni aga masani e tausisia, e pei ona faia e papalagi, e momoe ma feala ai i le faitau ma le tusitusi.

Ae tataua ona tele ni tusi ma ni alaga'oa Samoa e faavae ai sea pelega i a'oga ma aiga. Lea ua sausau fia lele ai Sinalegalu. Talosia ia tau lau o le faamoemoe.

“mafauauga o le vaiaso”

E iai nisi solitulafono e sili atu le leaga i lo le sunui o tusi. E aofia ai le le faitauina.

Joseph Brodsky—se fatusolo Rusia lauiloa

*Tulimau o Pole:***Potu fou,
alofa taugata
ma Facebook malie**

E le uma le agaga faafetai i lo tatou Matai Faia'oga Sili, ua tatou maua mai ai foi lenei vaiaso fou i le soifua ma le malosi.

Ae alo maia, o nai tala foi nei o lena vaiaso o mea na tutupu i lo tatou siosiomaga a'oga.

Muamua o le tala fiafia. Ua sauni le malo o John Key e faaopoopo ni potua'oga fou se 239 mo Aukilani. Lua togi faaopoopo mo le National. Kava ai le 2 ua le iloa i le Minisita o Falepuipui, lea ua tau omia i le va o le faitoto'a ma le potu taofia.

E le uma le alofa pea o le minisita o A'oga i ona lava tagata. Tiga ona fai atu e faaletonu ae onosai pea. Ou te malamalama, ana o a'u foi lea e Minisita, na o tamaiti Samoa lava foi e ave i ai la'u faamuamua. Ia, onosai i le maemaea o isi pati. O avanoa faapea e le aumaua e i latou.

Manaia le fuafuaga lea ua faataitai i nisi a'oga. O se tapenaga ina ia mautali le fanau ma faia'oga i le afaasalalau pe a tula'i mai ni pefea e aafia ai le igoa o le a'oga. Lelei pe a faaoga foi ma isi gagana ae le na o le Igilisi.

E malie foi le faitioga lea ua aliali mai faapea o le a leai ni galuega a nisi faia'oga ona ua toatele tamaiti ua fia ave a latou kamuta ma tomai faapena. Ia, tailo. Afai o le tali lea i le le pasi o isi fanau i mataupu masani, aisea la e sa'i ai? Fai mai o le a le maua ai ni vaega tupe tetele mai le malo. O le fea le mea taua? O le tupe po o le lumanai o le fanau a'oga? Ia, faavasega ane e oe.

Tumu a'u i le le fiafia i nisi o Facebook e ta'u ai si o matou nuu pele. O'u tau ane i se tasi tusi, fai mai 'malo le fanufanu i lau sua Pole.' 15 mea sese o le kalama, mai le 10 upu na tusi. A fai mai la le fesili, Do you know Vale BroTon? O la'u tali, ou te matua le iloa lea tagata. Ailoga foi na fanau i lo matou nuu.

A ia manuia lenei vaiaso. Soifua.

E FETAUI LENEI TALA MO VASEGA MATUTUA

Feiloai i magafetau soifua

O le alii o Lafailapa'itagata o le nuu o Neiafu i le Alataua na faiava i le tama'ita'i Falealili o Pouliofata, ona iai lea o le tama o Taulupo'o ma lona tuafafine, o Leutogitupa'itea. E mafua le igoa o le tama ona o lona uiga saua a o laititi, aemaise i lana tupulaga. Sa iloga ona uiga toa ma le le fefe, a ua aliali ai fo'i ma aga saua. Na i'u ina faatutu i ai le ita o tagata ma lamalama fo'i se auala e tau ai ona uiga ma ana amio. Pe na iteite le tama e le taumate e ono foua o ia e tagata i se aso. Ona tonu lea i lona loto, o le a alu i Savaii e nofo ai. Ona tu'ua lea e le tama o le aiga o lona tina, a ua faae'e lona va'a ma folau atu faatasi ma nisi o ona aiga poo ana uo fo'i i Savaii. Le alii lenei na iloga ona uiga i le aiga o lona tamā, i le Alataua i le motu o Savaii.

Ina ua taunuu Taulupo'o i le aiga o lona tamā, ona ia faasaga loa lea ua tapena ma atia'e ona eleele, ma ua faapena fo'i ona opogi e tagata o le nuu. Na mavae ni aso, ona alu lea o Leutogitupa'itea e asi lona tuagane, ma ua ia fia nofomau fo'i e mafua ma Taulupo'o le tuagane pele. Sa faae'e i le tama le suafa Lafai ina ua mavae lo la'ua tamā. Sa so'ona amio saua le alii talavou, ma na iu ina au aso tagata i le alii. Ua aliali le saua ma le mata'utia o Taulupo'o. Sa afio i gauta i le mea ua igoa ia Ulusuati. Atonu e le tau faamatalaina le uiga o le nofoaga na nofo ai le alii saua. O le tasi vaega o lea ogaeleele faapea e foliga o se mea tafato, o iina na suati i ai ulu o tagata na fai ai aso o le alii. Pei fo'i uiga na ola ai lenei tagata o aga a nisi alii saua i po o le Vavau.

O Leutogitupa'itea o se tama'ita'i lalalei. Sa aave fo'i ona tala, ma o le ala lea na folau mai ai le tasi Tui Toga i Samoa lea na faaipoipo ma le tama'ita'i. E tele uiga sa iloga ai ma ta'uta'ua ai Lafai Taulupo'o. O le mamalu, e toa ma saua fo'i. O le ala lea na atili tamali'ia ai le fesilafaiga ma le Tuitoga, lea ua faatasia ma lona tuafafine o Leutogitupa'itea. Ae iai le mea na tulaga ese ai Lafai Taulupo'o, o le fiafia lea o le alii e faalata ma faafagafao manu o le vao, e pei o pe'a o le vaomatua. E o'o mai i le aso, o loo iai ogaeleele aga'i mai

Neiafu i Tufutafoe, ua ta'ua lea mea o le pa pe'a e mafua mai ia Taulupo'o.

A o lei tu'ua e

Leutogitupa'itea ma lona alii le nuu, sa faia e Taulupoo ma lona tuafafine ni tu'utu'uga e faatatau i ni mea tutupu a o laua vava mamao. Sa iai atua faaleaiga. Na avea fo'i ma ilamutu e faaalia ni mea o le a aliali mai e tusa i le puipuiga o le saogalemumu o le tuafafine pele. Ua folau le teine ma lana tane, a ua nofo tapua'i le alii i lona aiga, ma matau pe faalogologo fo'i pe tua ma ni a le toesea mamao o le tuafafine pele.

Na pele i le Tuitoga lona faletua Samoa. Peita'i sa le atoatoa le fiafia o le Tuitoga auā e leai se fanau a le tama'ita'i Samoa. E tele avā a Tuitoga, faatasi ai ma Leutogitupa'itea.

O le tasi aso, o lea o le ta'eleaga a le tamaitai Samoa ma se tasi o faletua o le Tuitoga, faatasi ma le pepe a le tama'ita'i Toga lenei. O Leutogitupa'itea fo'i, ua ita tele, ina ua faaluma i ai le tama'ita'i Toga ona e leai sana tama. Sa mua'i faamalu le tama'ita'i Toga, a ua va'ai e Leutogitupa'itea le pepe ma faatalitali le taimi e ta'ele ai. Sa le i toe faatali Leutogitupa'itea i le faia lea o le tau i lona faaluma. Sa ia faao'loa lava le oti i le tamaitiiti, ma ua sola ese. Talofa i le tamaitai e ana le pepe, e maua ane le tamaitiiti ua oti lava. Ua iloilo lona tino ona iloa ai lea o le mea leaga ma le faalealofa ua faia e le tama'ita'i Samoa. Ua o'o le tala i le Tuitoga, ua to'atama'i tele lea o ia ma fai le poloa'iga. Ia pu'e mai le tama'ita'i Samoa, la'u le fafie e susunu ola ai le pagota.

Ona saisi lea o le tama'ita'i ua sauni foi le nofoaga e faao'loa ai le sala. Ua ave e tagata Leutogitupa'itea ma noa mau i le la'au o le fetau. Ona tafu lea o le afi tele i lalo ifo o le mea o loo saisi ai le tamaitai. A o lei

pu'eina Leutogitupa'itea mo lona faasalaga, na ia manatua Taulupoo ma le poloa'iga na la osia. Sa faia e le tama'ita'i ni faailo ina ia iloa mamao mai ai e lona tuagane le mea ua tupu. Na iloa e Lafai le faaaliga, ona nanati lea o gaoioiga, ua ulufia e ilamutu uma poo aitu o le aiga ia pe'a fagafao ma felelei atu loa e lavea'i le tuafafine mafatia. Ua fesaga'i to'atasi Leutogitupa'itea ma le matautia o le maemaea o le Tuitoga. Ua leai nei se toe lavea'i, ua faatalitali fo'i ma loimata le tama'ita'i auā ua o'o mai lona iuga. Na faafuase'i ona faalogoina e le tama'ita'i leo o le vavao ma peisea'i ua pogisa le lalolagi. Ua taunuu le malaga a pe'a. Ua fai le galuega lavea'i ma iu ina mate le afi semanu a pa'i ane i le tama'ita'i puapuagatia. Ua talitonu le tamaitai, o pe'a uma ia mai lona aiga i Samoa, ma o fagafao a lona tuagane o Lafai Taulupoo. Ua motusia noa-noataga. Ua matua leai ma se aloiafi o toe ola. O le selau ma selau o pe'a ua saili ane o ni fualaau lelei mo le tama'ita'i se'i tali ai lona galala ma le matelaina. Atonu e le i tafa lelei ata o le aso fou a ua taunuu le aufaaoosala i le mea na saisi ai le tamaitai. Sa vaaia o ia ua le afaina lava i le afi, atoa ma le anoano o manu o loo felelei solo i luga a'e o le tamaitai. E fou ia manulele i le vaai a tagata auā e le maua i laufanua o Toga.

"Ua tatou fetai ai o magafetau soifua," o le ofoalofa atu lea a le tamaitai i tagata o loo fetuleni ane i le fia maimoa i se tulaga ua oo i ai.

Na logo le Tuitoga, ona toe poloai lea ina ia momoli le pagota i se motu tuufua na o le aitu o loo mau ai. Sa faapea le Tuitoga o le a faaumatia o ia e le aitu o Losi o loo mau ai. Peitai ua na o le tilotilo i ai o Losi a ua leai sana mea e fai i le tamaitai. Ai na faapea le aitu e iu lava ina oti o ia i le matelaina, auā e leai se mea e maua ai sana

mea'ai. Ae fai mai le tala, na la'u ane e pe'a fualaau e tele e tausai ai le tamaitai a o iai i le motu. Ai lava foi na maua ane i pe'a se afi e faavela ai ana mea'ai. O ilili sa fai ma tau o umu poo ana suavai.

Sa folau lata ane i le motu le vaa o le Tuivea, ona talo atu lea o le tamaitai i le alii ina ia afe i uta lona vaa. Sa tomanatu le tamaitai, ona pau lea o le ala e mafai ai ona ia tuua le motu, o le folau faatasi ma Tuivea. Mulimuli ane, na fanau mai lea o le tama a le tamaitai ma na ia faaigoa ia Faasega. O le tama lea na ia auina atu e saili lona tuagane o Lafai Taulupoo i lo la aiga i le Alataua.

O upu mavae a Leutogitupa'itea i lana tama. E tolu igoa o le a e alu ma oe i lo'u aiga, e faamanatu ai mea na tutupu i o'u puapuaga ma le agaleagaina o a'u e le Tuitoga: Muamua o Tilomai - faamanatu ai le na o le tilotilo mai o le aitu o Losi ia te a'u, a ua na le faia se leaga. Lona lua o Tauiliili - e faamanatu ai a'u umu sa avea ai ilili e fai ma tau e ufiufi ai. Lona tolu o le Tonumaiepe'a - e faamanatu ai le laveaiina o a'u ai faigata i tonu mai pe'a, o saualii uma mai lo'u aiga. E le gata i lea, o pe'a uma na felelei i Toga mo le laveaiina o le tamaitai, e lei toe foi mai i lo latou laueleele, na tutupu a'e ai, a ua nofomau i Toga e oo mai i nei ona po. O ilamutu ta'i'au a Lafai Taulupoo na ta'ita'ia le malaga a pe'a aga'i i Toga, o pe'a papa'e ia e lua, e ese mai ai i le selau ma selau o pe'a uli uma e pei ona molimau i ai le mamalu o le Alataua i Sisifo. O le faamaoniga o lenei tala o suafa e tolu na sau ma le tama o Faasega mai lona tina o Leutogitupa'itea, lea ua avea ai le Tonumaiepe'a ma suafa e faao i ai le Alataua. Atoa foi le alagaupu ta'uta'ua, Ua tatou fetai ai i magafetau o le soifua.'

Toe faamatala e Fauatea Aiolupo ma isi o Falelima



Sponsored by Evaleon Books

LOUTALA FA'ASOLOPITO
SAMOA HISTORY
"Ne'i mea ane ua galo"

**26—31 Iulai****26**

1893 Tuua Samoa e Mataafa Iosefo ma le aumalaga faaauuu Atu Maresala

1880 Tofi le tumua o Palauli, feita Faasaleleaga ma Saleaula (Tuvale)

27

1999 Pu'eina Leafa Vitale e leoleo e faatatau i le mataupu i le maliu o se minisita a le malo

1970 Uluai meli i le ea va o Apia-Asau (Air Samoa)

28

1982 Lau le iuga a le Fono a Faamasino Mauuluga Lonetona avea ai Samoa fananau 1924-1948 ma tagatanuu Niu Sila

1927 Folasia (tulafono taufaaofi) Tulafono Teuteu Samoa

(Samoa Amendment Bill) i le Maota mauuluga Niu Sila

1914 Amata le Taua Muamua a le Lalolagi

29

1942 Taunuu i Apia le vaa SS Lurline ma le uta o aupega o le taua

31

1994 TA. Malo le Manu Samoa ia Kuiniselani, 24-22

1993 Malo le Olopeleki i le Manu Samoa, 35-13, Eden Park

1985 Taunuu i Apia David Lange, palemia o Niu Sila

1888 Taua i Tiapapata i le va o Safata-Siumu ma le malo

Ata i luga: David Lange (4 Auk 1942-13 Auk 2005), avea ma palemia o Niu Sila i lona 41. I lana pulega na talia ai le gagana Maori o le gagana e tasi ma aloaia a Niu Sila.

Sitiseni Leiloa?

O se tasi o faaiuga tau faamasinoga e aafia ai le igoa Samoa o le a umi ona manatua, o lena sa faia i se falefaamasino i Peretania i le tausaga e 1982. E pei ona silafia



Le tama'ita'i o Falema'i Lesa

e le to'atele le tala i le mafua'aga, i le tama'ita'i Samoa o Falema'i Lesa na tete'e i le fa'aiuga e toe faafo'i o ia i Samoa ina ua sili aso e nofo ai i Niu Sila. Na mafua ai ona fa'aulu lana tagi i le fa'amasinoga e fa'apea o ia lava o le tagatanuu a Niu Sila, talu ai faia faaletulafono i le va o tagata Samoa ma Niu Sila i taimi o ana pulega. Na te'ena lana talosaga e le faamasinoga, ona ave lea i le faamasinoga apili mauuluga a Niu Sila, i Lonetona.

Na aumai le tali e lagolagoina le mau a Falema'i Lesa. Ma e lei luagia le manino o le faaiuga, o i latou uma na soifua i le va o le 1924 ma le 1948 e au i le sitiseni a le malo Niu Sila. Ae le gata ai i lena, o a latou fanau e au fo'i i lena faamanuiaga. O se fa'aiuga iloga lea pe a talanoa i le tulafono ma lana pule po o aafiaga i se vasega to'atele o tagata. E tele ni felafolafoga i palemene e lua (Samoa ma Niu Sila) i lea taimi. I Niu Sila nei na malosi le leo o le tete'e, ma uuna'i ai le malo e saunia se 'alofaga.

Na tonu ia Tofilau ma le HRPP e talia le savali a le minisita Niu Sila o Jim McLay, ma saini ai le maliega a Samoa i le suiga ua fuafuaina. Talu mai le faaiuga a Lonetona ma lona toe suia i le maliega a Samoa, e foliga o loo iai pea se faagaulemalie i nisi i le tulaga ua taoto ai lea mataupu. E pei ona faatula'i mai le mau o le sitiseni i Niu Sila nei e talosaga ai le palemene mo se toe liuliuga o le tofa. Ui i lea e foliga ua siliga tali i seu se tali, poo le fea lava le itu faaupufai e tula'i mai.

Atonu o le fesili o loo tauilo pea i manatu, ana teena e Samoa le savali, ae talia le sitiseni, o a ni ona tua mo Samoa ma ona tagata? Pe tua i ni lelei pe tua fo'i i ni masei. Saunao Tofilau i lea taimi, o lenei filifiliga e lelei ai Samoa i le tulaga alualu mamao i le va o malo e lua.

Tolusefulu nei tausaga talu le maliega, o le a sou taofi? E sa'o Tofilau pe sese?

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com


Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.

Sponsors:

New Zealand Lottery Commission

Evaleon Books & Niupac Publishing

Whealers Books (NZ)



Sini Autu: Ia sa'o faaleoga o a'u vauelei vaivai

Alaga'oa e a'oa'o ai: upu i pepa malo

Faaleo ma ta'u atoa:

I le leo muamua

silapela ta'u atoa leai se faailoga

1. a-'a a'a aa

2. a-'o a'o ao

3. a-'u a'u au

4. a-'e a'e ae

I le muamua ma le lua

silapela ta'u atoa leai se faailoga

1. a-o ao ao

2. a-u au au

3. a-i ai ai

4. i-a ia ia

O o'u togi na maua

Fale Fauupu:

O meafaigaluega e lagolago ai galuega faatino:

O le lisi o upu:

1. a'a

A'o

A'u

A'e

2. ao

au

ai

ia

O ni fesili:

1. Pe na sa'o lelei le faaleoga o a'u upu?

2. Pe na sa'o lelei la'u faaleoga o le vauelei muamua?

3. O a ni isi upu masani ou te iloa lelei o latou faaleoga?

UILI FAU UPU

Saili tali o fesili o lo'o i lalo. Pule oe pe sipela i luma (clockwise) po'o tua (anticlockwise). E sa le feosoosofa'i.



1. Ta'u mai ni soa se tolu o le malie i le Igilisi:

2. Saili ni fausaga o le upu malie


3. Su'e le upu suamalie; tusi sona faamatalaga:

4. Tusi uma upu/ fuiupu e ta'i 4-8 mata'itusi, ma o latou soa i le Igilisi (E faitau ai ma upu ta'ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

PASO I GAGANA E LUA

Faatumu le paso i upu/igoa Samoa. Fill the crossword box with Samoan words / names —unless stated otherwise.



Faalava~Across

- 1 poor quality (talo, taamu) (4)
- 3 be far-reaching (of tree foliage) (6)
- 6 law: to sue (2)
- 7 plea (5)
- 11 spreading (7)
- 12 burden (5)
- 15 knock (6)
- 16 Rugby: Alapati Who (5)
- 17 give up on somebody (3)
- 20 trip (6)
- 23 miss (the bus) (4)
- 24 t sound (2)
- 25 vacancy (6)
- 26 to dote on a child or someone (4)

2 stride along with arms

- swinging (5)
- 3 chess game (2)
- 4 bye (2)
- 5 sunny (2)
- 6 traditional: a group dance (4)
- 8 black (6)
- 9 alliteration (5)
- 10 written (5)
- 13 part of (5)
- 14 fold (of hand etc) (5)
- 17 stem of taro (2)
- 18 held (by) (4)
- 19 Asian continent (4)
- 20 first to the line (3)
- 21 tomb (3)
- 22 gum (3)

Lalo~Down

- 1 Bible: Another name for Jerusalem (5)



Ata: Ta'u mai le igoa o le siva ma lona faiga, ma lona uiga. E iai ni ona tulafono? (lautusi faamatala)

SUDOKU #22 (TAALOGA I NUMERA)

1	2				6		8	9
			7		9			
	8	9	1			4	5	
		4		6	5		9	7
3		5				2		4
8	9		2	1		3		
	3	1			2	9	7	
			9		8			
9	7		5				4	2

FAIGOFIE / FEOLOOLO / FAIGATA

©sudokuessentials

Fa'atumu pusa numera (tama'i sikuea) i fuainumera 1 i le 9. Ia uma ane le galuega ua maua atulaina ta'itasi (tu, fa'alava) o iai le 1 i le 9. E tofu le atulaina ma lona fa'atulagaga e ese mai le isi.

TALI GALUEGA OLA 21

UILI FAU'UPU 21

1. auma—sea breakers; auma—whirlpool; aumā— be of any use
2. taula & fausaga taula'i, taula'ia, taulaiga, taulaina, taulaga,
3. taulamua (veape & soanauna). E muamua pe taimua i se mea. Ua taulamua a'oga i le femisa'i; O se a'oga e taulamua le a'oga lena.

4. lamu—chew, lamua—chewed; taula—anchor, taula—to anchor, malu—sheltered, malu—shelter, malu—calm, malu—cool, taumalua—roll, sway;

TALI SUDOKU #21

1	4	6	7	2	8	3	5	9
2	5	7	9	1	3	4	6	8
3	9	8	4	5	6	1	2	7
4	8	3	2	6	9	7	1	5
5	1	2	3	4	7	8	9	6
6	7	9	1	8	5	2	3	4
7	2	1	6	9	4	5	8	3
8	6	4	5	3	1	9	7	2
9	3	5	8	7	2	6	4	1

PULUTO

- 1. Sa'o
- 2. Sa'o
- 3. Sa'o
- 4. Sese, e maua le vai i Puluto.



TALI PASO # 21

T	A	F	E	A	L	F	U	A
A	A	L	E	O	N	E	L	L
L	I	L	I	U	I	A	F	A
A	E	M	A	L	A	E	M	M
N	A	O	M	I	O	I	N	U
O	L	A	M	I	O	I	L	I
A	T	O	A	O	A	F	U	A
A	L	A	O	A	A	L	L	L
A	F	I	O	M	G	A	O	I
U	P	A	O	A	T	L	L	L
T	E	L	E	O	S	U	L	I

Faasa'oga: 9 faalava—hurricane ae le o le waterfall, faamalulu atu

© PasoSamoa, 1988

POLE MA PAPA





O le OLA o se tautua e fia fai sona
sao i le fa'aaogaina ma le faaualoaina
o le Gagana Samoa ~

Ae mana'omia ona ta'u atu, pasi atu,
momoli atu sana fesoasoani i
potua'oga, aiga, aai, nuu, ma soo se
mea e aogā ai—i soo se itulagi ~

E taua lau fesoasoani.

Faatasi ma isi tausimea a le gagana,
e tasi le faafitiga, ia faaolaola ma
faaaoga pea la tatou gagana, auā
fanau lalovaoa ~

O la ta gagana o lo ta'ua tofi mai le
Atua, e tuufaasolo a tupulaga ~

O le faavae latou te tutū ai ma le
mautinoa, 'ai suiga ma lu'itau a le
taimi.

www.ola888.com

E maua lelei le manino o le upega
o i luga pe a faaoga le google chrome



Faupuu:

O nai ta'iala e fesoasoani i le faaleoga tonu

LEO TASI

Ua faasino i nisi upu e le luagia o latou
leo ae tasi lava.

E iai faata'ita'iga nei: apu, ofu, esi, isu,
upu. E vave ona masani ai tamaiti i nei
upu talu ai e tasi lava le leo i taimi uma.
Peitai o nisi upu e tailua pe tele ni uiga.
Faata'ita'iga, ofu, asu

LEO LASI

Ua faasino i upu na e le tasi se leo
(faaleoga) ae tele.

E iai faata'ita'iga nei: ola (manava) e lua
i le 'ola (upu ofo); oti (maluu) e lua i le
'oti (manu); ala (auala) e tolu i le 'ala
(faalavelave) ma le 'alā (maa).

E manaomia se faamasaniga lelei o le
fanau i nei leo eseese taitasi.

GAUGALEO

O gaugaleo e soaina le upu
accentuation i le gagana Peretania, poo
lena e faatatau i le faaleotonuina o se
upu na o ia pe i se vaiupu foi.

E tolu gaugaleo masani: Ua faaigoa i
igoa nei:

1. Se'i po o le pa'i 2. Tala'i 3. Atoa
- Se'i e maua i siuleo matala e vave
pe foliga foi e se'i o latou ta'uga,
pe na ona faapa'i foi i ai. E māmā
o latou ta'uga:
Faata'ita'iga 1. o na e maua i
silapela muamua o upu e pei o nei.
Atua, ālofa, māma nāna
Le Atua o Samoa.
Faata'ita'iga 2. o na e taatele i upu
taifa mataitusi:
tala, tele, luga, lagi, solo, tusi
O le tala i le pusi ma le mama

